



MOCIÓN DE APOIO AO SECTOR MAR- INDUSTRIA ALIMENTARIO DA COMARCA FRONTE AO PROXECTO DE REFORMA DA LEXISLACIÓN DE COSTAS

A Xunta de Voceiros do Concello de Bueu, reunida o 25.11.2019, acorda levar ao pleno unha moción conxunta dos grupos de BNG, PP, ACB e PSOE, en relación co apoio ao sector mar- industria fronte ao proxecto de reforma da lexislación de Costas.

EXPOSICIÓN DE MOTIVOS

Os proxectos de reforma da Lei de Costas e do seu Regulamento causan unha enorme preocupación para o conxunto das actividades económicas que para exercer en condicións de aceptables de rendibilidade se ubican na franxa costeira, fundamentalmente porque necesitan un emprazamento e unha disposición fundamental relativo a captación de auga do mar. Isto lévase a cabo a través de mecanismos de impulsión e saída de dispostos na zona que vai desde as súas instalacións ata os puntos de captación e saída baixo a auga, soterrados, aprobados e adaptados a todas as normativas vixentes na actualidade.

O proxecto de reforma do Regulamento de Costas que está elaborando o Ministerio para a Transición Ecolóxica, e que polo seu gran calado vai obrigar a reformar igualmente a Lei de Costas, preocupa enormemente aos sectores produtivos afectados dado que pretenden introducir unha serie de preceptos novos, que amparan algunhas interpretacións moi restritivas que se estaban facendo da Lei de Costas, e disemínanse por todo o seu articulado preceptos novos moi xenéricos e abstractos que recrudecen as esixencias medioambientais en claro detrimento das posibilidades de exercicio lexítimo e sostible das actividades ligadas tradicionalmente ao mar de Galicia, que son as que conforman un tecido produtivo costeiro da nosa Comunidade Autónoma en xeral, e da nosa comarca en particular.

Como exemplo, o borrador do novo Regulamento recorta drasticamente a figura da prórroga extraordinaria das concesións de ocupación de dominio público marítimo terrestre, desvirtuando a letra e o espírito co que se creou esta figura na reforma da Lei de Costas de 2003, e que viña precisamente a apoiar as actividades produtivas costeiras que ían chegar ao seu termo, e ser desmanteladas polo tanto, no ano 2018 (30 anos despois da Lei de Costas orixinaria, de 1988).

A clave do debate estriba en que a dita lei creou unha figura novidosa, que deixou sen efecto a limitación do prazo máximo de duración que se establecía na Lei de Costas de 1988, precisamente creando unha prórroga extraordinaria, a contar desde a data na que esta se solicitara, tal como a lei e o regulamento establecían e seguen establecendo. O que se pretende coa reforma do regulamento é modificar o día de cómputo inicial, atrasándoo 30 anos atrás, ata o día un da concesión en vigor.



No mesmo sentido, refórzanse os requisitos necesarios para renovar as concesións e para obter prórrogas das actualmente existentes, pasando dos catro criterios orientativos ata hoxe vixentes aos 18 que se pretende introducir.

E o máis preocupante é que a maioría deses novos requisitos quedan nunha total indefinición, de forma que se deixa a porta aberta para a arbitrariedade máis absoluta á hora de decidir desde un despacho ministerial a cal das nosas empresas e sectores se lles permite continuar e a cales se expulsa.

Exemplo desa abstracción, e polo tanto, da inseguridade xurídica que provocan, son requisitos novos como “o impacto paisaxístico”, “a protección ecolóxica da interacción terra – mar”, “...o incremento altura de onda ou cambios de dirección oleaxe” (sic: art. 135.4), ou “outros criterios como aplicación do previsto en calquera outra norma española e europea, así como convenios internacionais que conteñan regulación relativa á costa e ao mar...” (citas textuais do borrador de novo Regulamento).

Sobre unha base tan endeble e maximalista preténdese revisar todas as ubicacións actuais na costa que segundo os informes do Ministerio poidan non coincidir con eses novos criterios do borrador, algo que poida levar a consecuencias devastadoras para os sectores produtivos galegos vinculados á costa e a toda a economía social e pesqueira, ao verse potencialmente afectados, non só as industrias produtivas do país senón incluso unha enorme cantidade de explotación asociadas a Miticultura, Acuicultura de Bivalvos e Marisqueo amais de edificacións, vivendas entre elas.

Por outro lado, que a experiencia destes sectores evidencias que non son actividades en absoluto insostibles desde o punto de vista medioambiental (como o proba o feito de que están fortemente controladas por diversos organismos públicos), e de feito en ningún momento do borrador se afirma que a causa da modificación sexa unha problemática de tipo ambiental, senón, unicamente, unha decisión conceptual: a aposta das autoridades de Costas por un litoral libre de actividade produtiva, o que supón á súa vez optar por un uso preferentemente recreativo (para o que tampouco se ofrece ningunha alternativa, por suposto) fronte aos usos produtivos tradicionalmente vinculados ao mar.

Ante esta situación tan alarmante para este Concello e a súa comarca, sométese ao debate e apoio do **PLENO** da Corporación Municipal de Bueu, o seguinte:

ACORDO

Instar ao Goberno do Estado e especialmente ao MITECO (Ministerio de Transición Ecolóxica):



CONCELLO DE BUEU

ALCALDÍA

Rúa de Eduardo Vincenti, 8. 36930 - Bueu (Pontevedra)

TLF. 986 390 029 / FAX 986 322 099

CIF: P3600400J. Rex. E.111

1. Que reconeza a realidade da Comunidade Autónoma Galega e da Comarca do Morrazo en relación á realidade histórica e socioeconómica do sector Mar Industria, Acuicultura e Marisqueo que ao longo do último século serve como base fundamental para o desenvolvemento social e económico desta comunidade, e que pon en entredito un regulamento absurdo que demostra o claro descoñecemento da realidade social da nosa comarca.
2. Con carácter previo á aprobación de modificación algunha, convocar unha mesa de análise e negociación cos sectores vinculados ao mar para aprobar un acordo que permita que o proxecto do Regulamento Xeral de Costas e a Lei de Costas teña en conta as reivindicacións socioeconómicas do sector do Mar de Galicia.
3. Negociar e aceptar un acordo para que se teña en conta en dito proxecto e na súa Lei, no concernente ao prazo das súas concesións, para as actividades económicas do complexo mar industria da comarca que para o seu indispensable funcionamento deban estar no litoral, se comece a contar o prazo de concesión a partir da solicitude de prórroga extraordinaria e non desde a data de concesión orixinal.
4. Dar traslado do presente acordo ao Goberno de Estado.

Xosé Leal Fariña

M^a Elena Estévez Freire

Voceiro do BNG

Voceira PP

Julio Villanueva González

José Manuel Vilas Pastoriza

Voceiro de ACB

Voceiro PSOE